



No val nuie jessi frut!

Cidin.

O scuën sta cidin e fer. Misurâ cun estreme atenzion i moviments di fâ. Se no no la puarti fûr.

Ta presse dal cori no ai fat a timp a cjatâ un puest miôr. E aromai cumò no pues fâ nuie altri.

Lu sint. Al rive. I sint i siei pas. Al vûl me!

I cîr di calumâ ogni piçul segnâl da sô presince, ma il scûr che aromai al è plombât al à cuasit platât dut.

Lu sint a sgarfâ. Al cîr me. Al è il so compit. Il so cefâ. Al è ce che al brame. Lui: l'orcul! Di bot, la cjampane grande da glesie! I conti cun cure i bots. Nûf sore sere. O varès di sei bielzà a cjase, tal clip, tal sigûr...

I soi tas pestis. Denant dai voi, tal neri da gnot che e rive di sburide, mi par di viodile la muse di mê mari. Mame... Ce che o volarès cumò jessi scrufuiât tal to grim. Come timp fa cuant che o jeri plui picinin.

E invezit o soi chi. Ingredeât, incjastrât, costret intune posizion innaturâl!

Un rumôr mi fâs strabalçâ! Oh diu, velu che al jentre!

Il cûr al bat a mil!

Il flât si ferme!

La puarte si vierç cun lentece. Un fil di lûs mi lasse viodi une man che e palpe l'air.

Ogni dêt incurvât come une britule prone par fâmi a tocuts!

Dut a colp un berli orent, slavrât, zigât cuntune vôs stridule! E il sanc mi si glace intun marilamp!

*Sandrino! Batti sasso Sandrino!*

Ecco. I savevi! Nol è just! E cumò mi tocje a mi stâ sot.

E come ogni sere di cheste maladete Istât no ju bechi plui chei lazaron.

Dome parcè che i soi il plui piçul da companie.

In ciertis robis, no vâl nuie jessi frut!

**di Michêl Londar**